



Komunikadu Imprensa
08 Maiu 2023

Estrutura Suku Uma Ana Ulu foin kompriende katak fetu no mane iha direitu hanesan ba fahe eransa

Iha 03 no 04 Maiu 2023, JSMP realiza treinamentu ba asuntu asesu justisa formál ne'ebé foka liu ba prosesu kazu krime no sivíl no kompetensia autoridade lokal ba rezolusaun krime no sivíl tuir lei prosesual. Partisipante sira husi treinamentu ne'e kompostu husi estrutura suku hanesan xefe suku, xefe aldeia sira, lia nain no delegadu/a sira, Ofisial Polisía Suku (OPS) no comunidade sira husi Suku Uma Ana Ulu, Postu Administrativu Venilale, Munisípiu Baukau.

“Atividade ne'e halo ho intensaun atu hasa'e koñesementu estrutura suku nian kona-ba oinsa atu rezolve no kanaliza kazu comunidade sira nian tuir preferensia lei ninian iha nivel aldeia ka suku no oinsa comunidade sira bele lori sira nia kazu ba iha justisa formal bainhira comunidade sira la konkorda ho mekanizmu rezolusaun iha suku ka aldeia,” dehan Sr. Casimiro dos Santos, Adjuntu Diretora Ezekutiva JSMP.

Iha abertura, Xefe Suku Uma Ana Ulu, Sr. Vicente De Sousa Boavida, kontente tebes ho programa treinamentu asesu justisa formal nian ne'ebé JSMP realiza iha sira nia suku tuir akordu iha nota intendimentu ne'ebé asina ona iha fulan sira liuba. Xefe suku enkoraza lideransa suku sira no comunidade sira atu fó sira nia konsentrasaun no ativu hodi husu karik iha duvida ruma, nune'e bele hatene klean informasaun sira ne'ebé JSMP fahe.

Xefe aldeia sira iha suku ne'e haktuir katak sira foin mak rona informasaun kataka fetu no mane iha direitu hanesan bainhira fahe eransa iha família laran no sira mós foin rona katak kazu sivíl bele rezolve iha nivel suku, maibé la taka dalan hodi lori ba tribunal.

Materia sira ne'ebé fahe iha sesaun treinamentu ne'e mak hanesan prosesu kazu krime no kazu sivíl no oinsa comunidade sira bele lori sira nia kazu ba iha justisa formal karik sira iha kazu.

Treinamentu ne'e JSMP halo durante loron rua, iha loron 3 no 4 Maiu 2023 no tuir planu atu envolve autór judisiáriu sira hanesan juis, prokuradór no defensor hodi esplika direta prosesu kazu krime no sivil iha tribunál maibé la konsege tanba autór judisiáriu sira okupadu ho julgamentu. Partisipante sira ne'ebé partisipa iha treinamentu ne'e hamutuk ema nain 22 ne'ebé kompostu husi mane 15 no feto nain 7 no husi total ne'e, inklui mós ema ho defisiénsia mental nain 1 no membru LGBTI nain 1.

Durante treinamentu loron rua ne'e, partisipante sira ativu tebes hodi hato'o sira nia preokupasaun no sujestaun sira. Iha loron primeiru apresentasaun materia krime nian partisipante sira husu katak autoridade suku sira bele rezolve krime públiku ka lae no comunidade sira tauk atu apresenta denuncia ba krime públiku tanba bele hamosu relasaun ladiak entre sira ka ema ne'ebé apresenta keixa ne'e.

Entretantu iha loron daruak iha apresentasaun materia prosesusual no kazu sivil nian, partisipantes sira kestiona kona-ba ema ne'ebé okupa ema seluk nia rai iha tinan barak hakarak sai nain ba rai, projetu estadu nian kona-ba comunidade nia kintal no rai projetu nain indemniza deit ai-horis, feen laen fahe malu laen deit mak iha direitu ba sira nia rikusoin no aman mak iha direitu ba oan sira.

Relasiona ho partisipantes sira nia duvida no kestoes sira iha letan, JSMP hatan tuir lei penal, prosesusual penál, Kódigu Sivil, lei rejime espesial ba definisaun titularidade bens imovel, lei expropriasaun no Kódigu Prosesu Sivil.

Atividade treinamentu ne'e realiza ho apoia fundus husi Fundasaun Azia (TAF) ba Programa Apoiu Seguransa Komunitária (PASK) ne'ebé finansia husi Embaixada Nova Zelandia.

Atu hetan informasaun liutan favór kontaktu direktamente:

Casimiro dos Santos
Adjunto Diretora JSMP
casimiro@jsmp.tl
Telefone: 3323883
www.jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl